

2 Korin

¹ Pol, Negur nē oroya bunem Kristus Jesus nē aposel wō aun, neda turada Timoti ado, pas enei Negur nē sios Korin bun ado, tamo kayau fateul ganan Akaia provins bun dibodok bun matotof.

² Tamada Negur ado Odug Jesus Kristus neid wau ifenēya ado wau inosiya, ā bun ibodōf.

Wau Yo Fiya Ganan Nē Negur

³ Negur, neda Odug Jesus Kristus Tama, wau yūya nē Tama, wau yo fiya ganan nē Negur yana talesauf, ⁴ ī neda morō ganan bun wauda yo fedig, anī nigin, ada dug wau yo fiya Negur bun tamal talen anī bunem, idi morō adodo anidi waud yo tafedig. ⁵ Kristus nē darau gogūf, ada namedan isif gen, neda wau yo fiya anīg Kristus bunem gogū felef. ⁶ Amā darau malef are, anī āgenei wauī yo fiya nigin ado, kel gei yeīya nigin. Amā waumā yo fef are, anī āgenei wauī yo fiya nigin, anī bunem darau de tekelei amāg malef anī, ā faali gef ulegef. ⁷ Ā nigin nemā waumā iseya totol ifaref, ere nigin, amā keleī, are ā nemā darau walegef gen, ā nemā waumā yo fiyag walegef.

⁸ Turamā tar, darau amā Asia provins bun malen anī, ā to keleī youf anī, to oromak. Amā morō faali fiya kisi feleya sā bagai bun mabodon, anī nigin, amā mata ibodōya nē kisiḡ matoron. ⁹ Momoi, amā waumā bun, es fiya tamo kot bun taka laa fouf ye di, kisi fedig gen, kisi mafen. Anī ere, amā mug bun to mafar fen, Negur tamo gare den anidi kel turī fedidig ī bun mafarauf nigin enei wō yen. ¹⁰ Ī laa nē waila ado kafī fiya age fiya bun tamal yalelnaman, anī nigin, ī fau yalelnamāf. Ī toku yalelnamāf nigin waumā iseya ī bun manon. ¹¹ Are ā, āgenei kosēya

bunem usennamãge di, Negurem age foug. Negur ï musei neid kosẽya solof fen, wau ifenẽya nẽ ege luwa ifanamãf nigin, museim amã nigin Negur de difiyẽf.

Pol Iyõya Nẽ Delẽ Falei Yen

¹² Amã mug nigin seli yabiya are yeir: Nemã kisi es fiya bun kurõ fesif, are amã tenebur ein, Negur nẽ fateul ado momoi bunem, ã bun bagai age mafedig. Amã tenebur ein bouwa buru isennẽya nẽ kisi biya bunem to age mafedig, anĩ ere, Negur nẽ wau ifenẽya bunem age mafedig. ¹³⁻¹⁴ Amã ereb ã uweseg fen, ã keleĩ anĩ wal fiya to matotkeneik. Gama ã amã nigin naal keleĩ, anĩ ere, ã amã nigin keleĩ bagai youf anĩ oromak, anĩ bunem amã Odug Jesus nẽ naa bun ã nigin selĩ malesauf gen, ãg amã nigin selimã walesagauf.

¹⁵ Aya enei momoi bagai agef wõ youf au fen, ã sain uru el fiya walogouf nigin, ã ket ki yeĩya anĩ kisi afen. ¹⁶ Aya Masedonia provins ilya nigin asi, ki ayei ken, Masedonia ele fen, anenem ã gein baban kela asi di, ã aya Judia distrik ilya nigin sur wiyagauf nigin kisi afen. ¹⁷ Sain aya enei kisi afen, aya karika bagai age afen de? Aya, tenebur nẽ tamo kayau age difedig gen, nameun “Sã” au fen, sigoroum “Yo” auf de?

¹⁸ Anĩ ere, Negur ï age afoug ye fen, agef bagai dõ fedig gen, nemã od ã gein isif are yo ye fen, sãya sã. ¹⁹ Ere nigin, Negur Naal, Jesus Kristus ï nigin, aya, Sailas Timoti ado geid ã atun wogõ mayeĩdig anĩ, ï sain tekelei bun, yo ye fen, to sã yedig, anĩ ere, ereb ï yo yef anĩ, ï faimud agef dõf kisi feledig. ²⁰ Ereb Negur age afoug yen od anĩ ganan Kristus bun yoya dogol. Anĩ nigin, ï bunem ada Negur bun fula fiya medeĩya tarousiyoug nigin, sigoradam “Mmoi” taudig. ²¹ Negurem, amã ado ã, Kristus bun total tafarauf nigin age fef. Ï igirnada fen, ada bun mouf fi fel fen, ²² ï,

ada yogon nigin, ada bun yogon uris ino fen, ï wauda bun, ereb isiyouf anï momoi bagai isiyouf ye fen, yogon Awa Uur iben.

²³ Negur ï aya nigin keleï bagai nigin, ï neu od megeir fe fen, isennēdidig, ï aya isennauf nigin aweignek, are aya ã nigin wauï ina fen, morō ifeneïya ator ken, Korin to kela asin. ²⁴ Amã ãgenei momoiya nugo fiyēya nigin to age mafef, anï ere, amã ã wauï al foug nigin ã geid kabï malef, ere nigin, momoiya bunem ã total ufaregef.

2

¹ Anï nigin, aya ã gein morō ado baban to ki ayeïf nigin, neu kisi afon. ² Ere nigin, aya ã wauï morō afeneïf are, aim anï aya wau al fiya ifanauf, are ã aya morō afenein anim dogol sã de? ³ Aya enei bagai nigin atotkenein, are sain aya asiyouf bun, idi aya wau al fiya difanauf anidi bun, aya morō to alouf nigin age afen. Aya enei momoi auf, are sain aya wau al fef, ã gananeg wauï al fef. ⁴ Aya morō odug ado wau gudū fiya bun, inã odug ado atotkenein, are aya ã morō afeneïf nigin to age afen, anï ere, ã bun neu wau laa fiya odug bagai anï, ã keleï youf nigin age afen.

Mosor Tamo Nē Mosor Nigin Weder Tu Keleya

⁵ Tamo anim morō ifenen ouf are, ï aya morō to ifanan, anï ere, ï ã ganan morō sau fiya ifenein. Aya total bagai to arōf nigin ‘sau fiya’ auf. ⁶ ã musei gananem ï darau wenēgen are, ï nigin kisi feleya. ⁷ Age fiya ban, gama ã in mosor wedereï tu kel fen, ï wau yo gouf, anï bunem, ï wau gudū fiya fatuk bagaim to kuroub fiyēf. ⁸ Anï nigin, aya ï ãgenei wauï laa fiya baban ufelnēgouf nigin total od arokeneik. ⁹ Aya, pas bun ã atotkenein, ere nigin, aya ã kisi ayeï di, ã ereb ereb ganan bun neu od dō gouf anï ailauf nigin age afen. ¹⁰ ã taka nē mosor nigin wedereï tu kalauf are, ayag in mosor nigin wederou tu kalauf. Ereb

taka weder tu keleya nē ibodō di, aya wederou tu kelen, are aya āgenei biya fiya nigin, Kristus mala bun wederou tu kelen, ¹¹ are Satanem ada to wal fada fen, bilā youf nigin age afen. Ere nigin, ada yogon kisi keleī.

Bar Itenēya Mata Nē Kabī Tamo Tar

¹² Sain aya Kristus nē biya od wogō auf nigin Troas taun ele fen, Oduḡ ĩ aya nigin sukar kā fel mog ailen, ¹³ aya fau nameun wau inosiya san, ere nigin, aya turau Taitus an to ailen. Anī nigin, aya idi dabuo afiyēīd fen, Masedonia provins elen.

¹⁴ Anī ere, Negur de mafiyēf, ĩ faimud amā Kristus bun kusī wal fiya bun uyu iroukanamādig, agef fen, ĩ, amā bunem, Kristus nigin keleī anī nē sumeī biya, modoū ganan bun firagagaū feledig. ¹⁵ Ere nigin, amā idi kel gei fedif anidi ado idi isaikalauf anidi atun, Negur mala bun, Kristus nē sumeī biya. ¹⁶ Taka bun amā laa nē sumeī, taka bun amā mata ifenēya nē sumeī biya. Aim anī kabī age fiya yaleya kisi feleya? ¹⁷ Amā, musei idi Negur nē od nigin moni mala kabī daledig gen sã. Age fiya ban, Kristus bun, amā, tamo Negurem sur fedin gen, Negur mala bun momoi nē bunem wogō maudig.

3

¹ Amā baban yanamã yaleseya nigin gariya manof de? Amã, tamo tunī age difedig gen, kabī biya daledig nē isennēya pas, amam ā gein sur mafouf be, āgem amã bun sur gouf de? ² Ā aug anī, nemã pas, are waumã bun itoton, age fe di, tamo ganan keleī ken, diwesedig. ³ Ā aug anī, Kristus nē pas, nemã kabī nē kaū anī yaor gef, itoton are ink bunem sã, are mata ibodkeleya Negur nē Awa Uur bunem, meein fadaleya bun sã, are tamo waud bun.

⁴ Amã enei morok, ere nigin, amã Kristus bunem, Negur nigin momoiya ado. ⁵ Amã ereb taka amã mug bunem isif

yeya kisi feleya sã, anĩ ere, amã nemã kisi feleya Negur bunem isif. ⁶ Negur ĩ amãg bar iteněya mata ně kabĩ tamo wõya kisi feleya inenaman, are lo itotoya ně sã, Awa Uur ně, ere nigin, lo itotoya anim idenkesidig, anĩ ere, Awa Uur im mata ifenědidig.

Bar Iteněya Mata Ně Fula Fiya Medeĩya

⁷ Kabĩ laa irou isidig, are meein bun gegě itoton anĩ fula fiya medeĩya ado isin, anĩ nigin, Israel tamo kayau yogon fula fiya medeĩya nigin meleid dē yel fen, Moses ně nawa lo feleya kisi feleya san, anĩ ere, fula fiya medeĩya anĩ komomor fen. Kabĩ age fiya fula fiya medeĩya ado isin ouf are, ⁸ Awa Uur ně kabĩ ně fula fiya medeĩya anim lo ně fula fiya medeĩya anĩ to wal foug de? ⁹ Tamo neid mosor nigin bouweid bun od yūdig ně kabĩ anĩ, fula fiya medeĩyauf are, kabĩ madur bagai irou isidig in fula fiya medeĩya ně odug naig fiya bagai! ¹⁰ Ere kulu fula fiya medeĩya yenen, are gama ně fula fiya medeĩya odug bagai nigin, kulu ně are sa kelen. ¹¹ Ere komomor falauf ně anĩ, fula fiya medeĩya ado isin ouf are, faimud ibodkeleya ně fula fiya medeĩya, yogon odug naig fiya bagai!

¹² Anĩ nigin, amã waumã iseya age fiya ado nigin, amã wogõya bun tuninirya sã. ¹³ Amã Moses gen sã, ĩ yogo nawa bun lalan komomor fe mog, Israel tamo kayau to dilouf nigin, yogo nawa bun gabar dede fedig. ¹⁴ Anĩ ere, idi neid kisi totolen, are sain enei bun, bar iteněya tubu iweseya bun gabar de anim fau ibodok. Gabar anĩ fau yaleleya sã ibodok, ere nigin, Kristus bun dogol anĩ yaleleyauf. ¹⁵ Sain enei buneg, Moses ně itotoya iweseya bun, gabar dogo neid waud dede fedig. ¹⁶ Anĩ ere, ereb sain taka ĩ Odug bun falei youf are, gabar are lelek felef. ¹⁷ Gama, Odug ĩ Awa Uur, Odug ně Awa Uur ibodok ně an, are katĩ feleya taka sã. ¹⁸ Anĩ nigin, ada ganan, nawada

bun gabarem dede fiya sã are, Odug nẽ fula fiya medeïya tail fen, ada bun so fe di, ada ï gen falei fada di, neda fula fiya medeïya odugef iledig, are Odug bunem isidig, ï anï Awa Uur.

4

Mis Namen Safina Biya Bagai

¹ Anï nigin, amã Negur nẽ wau yÿya bunem kabï enei ado nigin, amã waumã bun to folo redig. ² Anï ere, amã inokõya ado mama nẽ naab matoron, amã to madeg ken, Negur nẽ od to falei mafeledig. Anï ere, amã momoi nẽ anï yaor mafe fen, Negur mala bun, tamo ganan dogo neid kisi es fiya bun, amã mug nigin yanamã iseledig. ³ Amã nemã biya od dede fiyauf are, idi inanakalauf nẽ anidi bun dede fedif. ⁴ Teneub enei nẽ waitou, idi momoiya sã anidi neid kisi ifofakelen, anï nigin, Kristus ï anï Negur nẽ malakanon, yogon fula fiya medeïya nẽ biya od anï nẽ lalan, idi ileya kisi feleya sã. ⁵ Amã, amã mug nigin to wogõ maudig, anï ere, Jesus Kristus ï Odug mau fen, amã Jesus nigin ãgenei ferfer maudig. ⁶ Negur ï iron, “Gugum namen lalan fula fei,”* yen, inim Kristus nẽ nawa bun yogon fula fiya medeïya anï, amã keleï youf nigin, yogon lalan waumã bun fula foug nigin inon.

⁷ Anï ere, amã nameman mis namen gen, safina biya bagai enei ado, are ereb ereb ganan wal fiya nẽ megeir, are amã nemã sã, Negur nẽ anï yaorouf nigin. ⁸ Amã siri ganan bun total bagai lai difamak, anï ere, narï famãya sã; ereb taka age mafouf nigin neneya difanamak, anï ere, amã waumã folo reya sã; ⁹ darau difanamak, anï ere, to folõ famalef; didenamã dirarak, anï ere, daũ famaleya sã. ¹⁰ Amã faimud Jesus nẽ laa anï, bouwamã bun faali ma mayõdig, are Jesus nẽ matag bouwamã bun yaorouf nigin.

* 4:6: [Jenesis 1:3](#)

¹¹ Amã mata mabodok, anĩ ere, faimud Jesus nigin laa bun dinenamãdig, are yogon matag nemã laa nẽ bouwamã bun yaorouf nigin. ¹² Anĩ nigin, laa, amã bun kabĩ yaledig, anĩ ere, mata, ã bun kabĩ yaledig.

¹³ Negur nẽ Itotoya eig yef, “Aya momoi aun, anĩ nigin, aya wogõ aun.”† Momoiya de tekelei anĩ nẽ kisi bunem, amãg momoi mauf, anĩ nigin, amãg wogõ mauf, ¹⁴ ere nigin, amã keleĩ, Negur ĩ Odug Jesus laa bun tamal kel turĩ fen anim, amãg Jesus geid kel turĩ fama ken, amã ã geid in mala bun inenadauf. ¹⁵ Enei ganan are, ãgenei biya fiya nigin, anĩ bunem, wau ifenẽya anĩ tamo kayau bun kaka fef ile di, dogo neid Negur de fiyẽya gogũ fef anim, Negur fula fiya medeĩya ifenẽf.

¹⁶ Anĩ nigin, amã waumã to folo redig. Amã bouwamã buru foinenem ilumuk iledig, anĩ ere, amã nameman naa ganan bun mataya tobol fe iledig. ¹⁷ Nemã karika ado sain modeg nẽ morõ anim, faimud ibodkeleya nẽ fula fiya medeĩya, are morõ anĩ ganan fatuk bagai wal fiya anĩ, amã malouf nigin kabĩ yaledig. ¹⁸ Anĩ nigin, ada ereb maladam tailef ani to lo tafalauf, anĩ ere, ereb maladam to tailef anĩ lo tafalauf. Ere nigin, ereb tailef, are sain tobega nẽ, anĩ ere, ereb to tailef, are faimud ibodkeleya nẽ.

5

Saa Tanon Ibodõya Nẽ Bouwa

¹ Ada keleĩ, tenebur nẽ salafat ada anĩ namen tabodõdig anĩ narĩ fouf are, ada fõ taka Negur bun tamal ado, are saa ilun oun faimud ibodkeleya nẽ fõ, are tamo imam inoya sã. ² Gama ada fõ enei bun tabod ken, osi taudig, age tafe fen, saa ilun neda ibodõya modoũ bunem ifounnadauf nigin wauda fatuk irõdig, ³ ere nigin, ada saa tanon ibodõya nẽ bouwa ifounnadauf sain bun, ada gemũ to diledauf.

† 4:13: Sam 116:10

⁴ Ada salafat enei bun tabod mog, morõ faali tafe fen, osi taudig, ere nigin, ada salafat enei lelek fel kanadauf nigin to orodadig, anĩ ere, saa ilun neda ibodõya modoũ bun ifounnadauf nigin orodadig, anĩ bunem, ereb laa nẽ anĩ, mata anim itob lauf. ⁵ Negur ã enei nigin bagai ada inoda fen, ada wauda bun, ereb isiyouf anĩ momoi bagai isiyouf ye fen, Awa Uur iben.

⁶ Anĩ nigin, ada faimud kisi total ado fen keleĩ, are ada bouwada buru ado tabodok sain anĩ bun, ada Odug weim to tabodõdig. ⁷ Ada momoiya bunem tabodõdig, ereb maladam tailef bunem sã. ⁸ Aya arok, ada kisi total ado fen, ada bouwada enei tator ken, Odug geid takai tabodõf nigin orodaf bagai. ⁹ Anĩ nigin, ada bouwada buru ado tabodok be tatorok be, ã wau al founf nigin ada kisi tatenẽf. ¹⁰ Ere nigin, ada ganan Kristus nẽ es fiya sia wagen wõ tauf bagai, are mugu mugu, ereb biya be sane be, ada bouwada buru ado tabod ken, age tafen anĩ kilei, yogon mala solo yalouf.

Komo Fiya Nẽ Kabĩ

¹¹ Amã Odug anini fiyẽya anĩ keleĩ nigin, amã tamo waud yaleya nigin age mafedig. Amã naig fiya anĩ Negur keleĩ bagai, age fiya gen, amã nigineg ãgenei kisi es fiya bun yaorouf nigin, aya wau irok. ¹² Amã ã bun baban yanamã yaleseya nigin to age mafef, anĩ ere, ã amã yanamã walesagauf nigin sain mafeneik, anĩ bunem, idi ereb waud bun ibodok anĩ fotokar, ereb meledim dilef anĩ nigin yeneid dalesedig anidi bun, ã solof irõya kisi feleya. ¹³ Amã wadã idenamãf, are Negur nigin. Amã kisi biya adouf, are ã nigin. ¹⁴ Kristus nẽ wau laa fiya anim amã toli famãdig, amã kisi mafef, tekeleim ganan nigin laa fen, anĩ nigin, yogon laa bun, ganan gare den. ¹⁵ ã ganan nigin laa fen, anĩ nigin, idi mata dibodok anidi dogo nigin to

dibodōf, anī ere, ī idi nigin laa fe di, kel turī fiyen anī nigin dibodōf.

¹⁶ Anī nigin, gama einenem ilef ganan, ada tamo nē karīya bunem taka to keleī youf. Ada kulu naab enei bunem Kristus kelein, anī ere, ada baban to age tafedig.

¹⁷ Anī nigin, taka ī Kristus bun ibodok, Negur ī yale, mata bagai inon. Tubu are ilele di, mata anī isin. ¹⁸ Enei ganan Negur bun tamal, ī Kristus bunem ada ī geid komo fada fen, komo fiya nē kabī anī ada ifanadan. ¹⁹ Are Negur ī tamo nē mosor idi bun to iwes fen, Kristus bun tenebur tamo kayau ī geid komo fedin. Agef fen, Negur ī komo fiya nē od ada bun inon. ²⁰ Anī nigin, amā Kristus nē soosi tamo, are Negur ī yogon wau irōya, amā bunem wogō yedig gen. Amā Kristus fotokar ā magoneik, Negur geid komo gouf. ²¹ Negur ī, ada nigin ye fen, Kristus mosor sā anī, mosor ī bun inon, are ī bunem, ada Negur nē madur bagai wowā tauf nigin age fen.

6

¹ Negur nē kabī tura tar amā, ā total bagai marokeneik, are Negur nē wau ifenēya walegen anī, ege to aaluwan ilauf. ² Ere nigin, Negur ī irok,

“Neu wau ifenēya sain bun, aya ō karī ayon,
kel yaleya nē naa bun, aya ō asennon.”*

Aya ā arokeneik, gama eī Negur nē wau ifenēya nē sain, gama eī kel yaleya nē naa.

Pol Nē Morō

³ Amā taka delē ilauf bun ye to tū fouf nigin meein to manodig, are nemā kabī yana sane to ilauf nigin age mafedig. ⁴ Age fiya ban, amā, naab ganan bun, amā Negur nē kabī tamo bagai ya anī mafelnēdidig, are feseya sā ifareya bun, darau, morō, wau morō bun, ⁵ didenamak

* 6:2: Asaia 49:8

bun, kalabus bun, kusī bun, kabī total bun, bō mulaī itorōya bun ado, naū bun, ⁶ karētut bun, keleī bun, molol bun, dor yaleya bun, Awa Uur Fateul bun ado, wau laa fiya bagai bun, ⁷ momoi nē wogō bun, Negur nē megeir bun, madur bagai nē waila ima biyalē ado ima kilē bun, ⁸ tunī yanamā dalesedig ado tunī to yanamā dalesedig bunem, yana sane inoya ado yana biya inoya bunem; amā momoi marok, anī ere, amā idegēya tamo gen kisi difedig; ⁹ idi amā nigin keleī, anī ere, keleī sã gen kisi difedig; gare mauf, anī ere, amā mata mabodok; didenaman, anī ere, to didenamakesin; ¹⁰ waumã gudū fef, anī ere, faimud waumã kulī yedig; maleg, anī ere, musei safina kisi feleya manenēdidig; ereb taka sã, anī ere, ereb ereb ganan ado.

¹¹ Korin tamo kayau, amā karika wogō mayein. Age ma fen, amā ã bun waumã sukar fatuk bagai kã mafen. ¹² Amã nemã waumã laa fiya ã bun to mafokeledig, anī ere, āgenei wauī laa fiya amã bun ufokelegedig. ¹³ Aya neu kesu tar bun gen ã wogō ayeik, ã solog fen, wauīg sukar fatuk bagai kãg.

Momoiya Sã Geid To Bagu Gouf

¹⁴ Momoiya sã geid to bagu gouf. Madur bagai sane ado naig de nigal dūf? Lalan gugum ado ere bunem nigal dūf? ¹⁵ Kristus Satan ado naig fe di, waud tekelei youf? Ere anī momoiya ado, momoiya sã atun tekelei? ¹⁶ Negur nē tempel, idegēya waitou atun, ere mamad katō fiya ado? Are ada mata ibodōya Negur nē tempel. Negur iron kilei, “Aya idi geid mabod ken, idi atun ayōf, age afe fen, aya idi neid Negur ouf, age afe di, idi neu tamo kayau ouf.”†

¹⁷ “Anī nigin, utornēdig fen,
fire ufareg,
Odug irok.

† **6:16:** Levitikas 26:12; Jeremaia 32:38; Esekiel 37:27

Ereb amuyẽ ado to kobũg,
ago ge di, aya ã aleyeif.”‡

18 “Aya ãgenei temeĩ di,
ã nau kesu tar, nau barai tar ouf,
Odug saa ilun nẽ kusĩ tamo guri feid uyu iroudig anĩ
irok.”§

7

1 ã neu oboiyou, ada Negur age afouf yen od enei ado nigin, ada dug er eb er eb gan an bouwa ado uur amuyẽ ifenẽdig anĩ lilik tafe fen, Negur anini fiyẽya bunem fateul bagai wõ tauf.

Pol Nẽ Kulĩya

2 ãgenei wauĩ bun, amã nigin modoũ unog. Amã aib taka bun to kũ mafenen, amã aib taka sane bun to manenen, amã aib taka idegnẽya bunem er eb er eb to son mafen. 3 Aya ã bouweĩ yũya nigin od enei to wogõ auf. Ere nigin, aya mogo oron, are ãgenei ibodõya modoũ, amã waumã bun ado nigin, amã ã geid mata tabodõf be, gare tauf. 4 Aya ã nigin fatuk bagai momoi au fen, fatuk bagai ã yeneĩ alesef. Aya wau fatuk bagai yalesef, nemã morõ gan an bun, neu wau kulĩya gogũ felef.

5 Sain amã Masedonia masin, nemã bouwamã enei si inoya san, anĩ ere, amã siri gan an bun darau difanaman, serẽ kiwai difanamã mog, nameman kumĩ ado. 6 Anĩ ere, Negur ã waud morõ adodo waud yo fedidig, Taitus isin bunem ã waumã yo fen. 7 Are, in isin bunem dogol sã, anĩ ere, wau yo fiya ã wenẽgen anĩ bunem ado. ã aya uleyagauf nigin bagai oroyein, er eb wõ yen anĩ nigin ãgenei awaun yeya odug fen, ã aya nigin kisi fatuk bagai

‡ 6:17: Asaia 52:11; Esekiel 20:34, 41 § 6:18: 2 Samuel 7:14; 7:8

walegedig anī ī irokanaman, anī bunem, neu kulīya odug bagai iselen.

⁸ Aya neu pas bunem wauī gudū fiya afenein, anī nigin, aya uruwa bun awaun aun. Anī ere, gama aya anī nigin to awaun auf, ere nigin, aya ailef, are neu pas anim, sain naal bagai dogol wauī gudū fen. ⁹ Anī ere, gama aya wau al fef, are wauī gudū fiya afenein anī nigin sā, anī ere, āgenei wauī gudū fiya anim, wauī faleiya bun irouleyein nigin. Ere nigin, ā Negur nē oroya kilei wauī gudū fen, anī nigin, amā ā daū fiya to mafenein. ¹⁰ Wau gudū fiya Negur nē orof kilei anī, wau faleiya irousi, kel yaleya bun irouledig, anī nigin, ada to awaun taudig, anī ere, tenebur nē wau gudū fiya laa irousidig. ¹¹ Negur nē wau gudū fiya eneim, ā bun faat yun anī ulogouf, are erob totol bagai wauī irōdig, morō wō yen anim to lai yeīf nigin erob ā aug madur gedig, erob sane nigin seye gedig, erob Negur nigin anini gedig, erob taka nigin bagai oroyēdig, erob kabī totol walegedig, erob sane age fen bun mala solo wenēgedig. Erub erob ganan bun, ā aug enei nigin kū fenēya taka sā anī yaor gen. ¹² Anī nigin, aya ā bun atoton are, taka ī sane age fen be, takam ī bun sane age fen anī nigin sā, anī ere, ā amā nigin naig ge wauī wanamāgef anī, Negur mala bun aug ulogouf nigin age afen. ¹³ Enei ganan nigin amā waumā yo fef.

Amā waumā yo fiya anī teten, amā Taitus ī fatuk bagai wau al fen anī mail fen, fatuk bagai waumā al fen, ere nigin, yogon uur ā ganan bunem filolō fen. ¹⁴ Aya ī bun yeneī alesen, age afe di, ā aya mama to wanagen. Anī ere, erob amā wogō mayein anī ganan momoi, age fiya gen, amā Taitus bun yeneī malesen areg, momoi anī yaoren. ¹⁵ Ā ganan ī dōg fen, aniniya ado tererēya bunem ī walegen anī, ī kisif fen, ā nigin yogon wau laa fiya mugi

bagai ilen. ¹⁶ Aya, ereb ereb ganan bun, ã nigin, sã momoi auf nigin, wau al fef.

8

Wau Ifenēya Bunem Kolekta Inoya

¹ Turamã tar, amã, ã wau ifenēya Negur Masedonia sios ifenēdin anī keleī youf nigin oromak. ² Idi morō odug bagai dale fen, maleg bagai dibodon, anī ere, idi neid waud kuliya mugi ado bun, idi isennēdiya nigin kolekta moni musei difenēdin. ³ Aya kurō afeis eig au arokeneik, idi ifenēdiya kisi feleya ado, anī wal fesiyag difenēdin. Dogo neid oroyam, ⁴ idi Negur nē tamo kayau isennēdiya kabī amã geid malouf, are dem de fen, anī nigin total bagai dirokanaman. ⁵ Age dife fen, idi, amã idi nigin kisi mafen kilei, to age difen, anī ere, idi anī wal fiya age difen. Idi dogo anī ketem Odug difen ken, anī dumen Negur nē oroya dō de, idi dogo amã difanaman. ⁶ Anī nigin, amã Taitus total bagai marokenen, ī uruwa bun gariya inon nigin, wau ifenēya nē kabī enei ã buneg bure falauf nigin marokenen. ⁷ Anī ere, ã ereb ereb ganan bun, momoiya bun, wogō bun, keleī bun, wauī adok irōya ganan bun, āgenei wauī amã nigin laa fiya bun, kisi feleya ago gef gen, wau ifenēya nē kabī enei buneg ã kisi feleya ago gouf.

⁸ Aya ã ago gouf bagai nigin sii fiya to afeneik, anī ere, aya sios tunī kabī total dalef anī bunem, āgenei wauī laa fiya anī, momoi be sã be anī es ayeīf. ⁹ Ere nigin, ã neda Odug Jesus Kristus nē wau ifenēya keleī, are ī safina kisi feleya, anī ere, ã nigin ī maleg wō yen, are yogon maleg bunem ã safina kisi feleya wō gouf nigin, ī age fen.

¹⁰ Aya enei nigin neu kisi, āgenei biya fiya nigin afeneik. Yar tubu bun, ã ket wenēdigen anī dogol sã, ã ago gouf nigin wauī iseya anīg adon. ¹¹ Gama kabī anī udikalagauf, anī bunem, ã ago gouf nigin, āgenei oroya total bagai

ibodon gen, ã safina kisi feleya kilei kabĩ anĩ bure wala-gauf. ¹² Oroya anĩ an ibodõf are, Negur ereb tamo taka safina ado kilei anĩ yalouf, ereb tamo taka safina sã bunem sã.

¹³ Amã nemã oroya, tunĩ waud karika ifenẽdi di, ã wauĩ morõ ifeneik anĩ sã, anĩ ere, ganan kisi kisi feleya ibodõya nigin oromak. ¹⁴ Sain enei bun, ãgenei ereb ereb musei anim, ereb idi lau difef anĩ gadõ gouf, anĩ bunem, dogo neid ereb ereb musei animeg, abag ereb ã lau gef anĩ gadõ difouf, age dife di, kisi kisi feleya ubodõgouf, ¹⁵ are Negur nẽ Itotoya eig ye irok kilei, “Taka ã safina musei kuru fen, ã musei bagai to yalen, taka ã naal kuru fen, ã to lau fen.”*

Taitus Korin Sur Difiyen

¹⁶ Aya, Negur ã, kisi aya ã nigin ado kisi de tekelei, Taitus nẽ wau bun inon nigin, Negur de afiyek. ¹⁷ Ere nigin, Taitus ã, nemã od ã ki yeiya nigin anĩ, de ye fen, ã yogon wau irõya odug bagai ado, yogon oroyam ã gein isif. ¹⁸ Amã, turamã taka biya od bun yogon kabĩ nigin, sios ganan yana dalesedig anĩ, Taitus ado sur mafedif. ¹⁹ Enei dogol sã, turamã ã anĩ, wau ifenẽya nẽ kabĩ enei bun, amã geid mayok malauf nigin, siosem digirnen, kabĩ are, amã Odug bun fula fiya medeïya marousiyouf nigin ado, amã nemã isennẽdiya nigin waumã irõya mafelnẽdiyof nigin kabĩ malef anĩ. ²⁰ Amã, wau ifenẽya bunem ege luwa musei dinon enei, lo ma mog, tunĩ anĩ nigin od sane to dirõf nigin oromak. ²¹ Ere nigin, amã Odug mala bun ado, tamo meleid buneg, ereb madur bagai anĩ age mafouf nigin lo mafedig.

²² Amã, turamã taka, idi geid sur mafedif, ã amã sain musei es mafiye ken, ã ereb ereb musei bun kabĩ total yaledig anĩ mailedig, ã ã nigin fatuk bagai momoi yef

* 8:15: Eksodas 16:18

nigin, ï gama isennēdiya nigin kabī total yaleya orib yef. ²³ Taitus nigin, ï neu tā tar taka, ï ā nigin neu kabī turau; nemā turamā tar nigin, idi sios neid arū tamo, Kristus bun fula fiya medeīya dirousidig. ²⁴ Anī nigin, āgenei wauī laa fiya nē kaū ado, amā ā yeneī malesedig anī nē gariya nē kaū, tamo eneidi ufelnēdigouf, anī bunem, sios idi anī dilouf.

9

¹ Ā mogo kelei nigin, aya Negur nē tamo kayau bun kabī enei nigin baban to atotkeneīf. ² Ere nigin, aya isennēdiya nigin āgenei wauī irōya total anī kelei ken, Masedonia tamo kayau bun yeneī alesedig, are yar tubu bun tamal isi, gama ā Akaia an isennēdiya nigin dodok gen anī arokenēdi di, isennēdiya nigin āgenei wauī irōya total anim, idi musei waud fā yen. ³ Anī ere, aya turau tar sur afedin, are amā ā yeneī malesedig anī enei bun ege to ilauf, anī ere, ā aya aron gen dodok gouf nigin, age afen. ⁴ Ere nigin, Masedonia tamo tunī aya geid masi fen, ā dodok fiya sā anī dilouf are, amā ā nigin momoiya age fiya ado nigin mama malouf, āg mama yeīf nigin ereb od taka sā. ⁵ Anī nigin, aya kisi afen, aya turau tar total bagai arokenēdi di, idi ketem ā gein dile fen, ā wau ifenēya nē ege luwa musei wenēdigouf urōgen anī nigin dodok fiya bure difalauf, are deuf, aun. Age dife di, wau ifenēya nē ege luwa dodok fiyauf, are nugo yeīya bunem ege luwa inoya sā.

Wau Ifenēya Bunem Safina Ifenēya

⁶ Enei karī walagauf, aib taka faat musei sā irarak, ï musei sāg kusu fouf, aib taka faat musei irarak, ï museig kusu fouf. ⁷ Tamo mugu mugu, ereb yogon wau bun ifenēya nigin kisi ifon anī ifenēf, are wau morō bunem sā, takam nugo fiya bunem sā, ere nigin, Negur ï tamo wau kulīya bunem ifenek nigin wau laa fef. ⁸ Negur ï wau

ifenēya ganan ā kisi feleya bagai ifeneña kisi feleya, are erēb erēb ganan bun, ā faimud erēb ā kisig fen, lau gef anī ganan waleg fen, kabī biya ganan kisi feleya bagai ago gouf nigin age fef. ⁹ Negur nē Itotoya eig ye irok kilei:

“Ī yogon safina firagagaũ feid fen, maleg ifenēdin;

yogon madur bagai faimud ibodkalauf.”*

¹⁰ Negur ĩ, faat irarāya tamo, faat ado yōya nē bret ifenēdig, ĩ āgenei faat irarāya nigineg ifen ken, musei inouf, agef fen, ĩ āgenei madur bagai nē kusu fiya odug inouf. ¹¹ Negur ĩ erēb erēb ganan bun, ā safina ado inoyeĩf, anī bunem, ā sain ganan wau ifenēya bunem musei wenēdigouf, ago ge di, idi amā bunem āgenei ege luwa dale fen, Negur de difiyēf.

¹² Kabī enei ā walegedig anim, erēb Negur nē tamo kayau lau difef anī nigin dogol to isennēdif, anī ere, ago ge di, musei idi Negur de difiyek buneg gogū felef. ¹³ Kabī ā walegedig anī bunem, ā aug nigin yaor gen, anī nigin, tamo idi Negur yana dalesauf, ere nigin, ā Kristus nē biya od kurō wesig fen, anī dōg fen, ā wau ifenēya bunem idi adok ganan bun musei wenēdigen. ¹⁴ Age de fen, ā nigin idi neid kosē bun, dogo neid waud ā bun isiyouf, ere nigin, Negur ĩ wau ifenēya erēb erēb ganan wal fiya anī ā ifenein. ¹⁵ Negur nē ege luwa dir feleya kisi feleya sā anī nigin, Negur de tafiyēf!

10

Pol Yogo Ne Kabī Nigin Isennēya Od

¹ Aya, Pol, tunī dirōdig, aya ā geid tabodok sain bun, are yukeleya dedig, aya ā geid to tabodok sain bun, are total od irōdig dedig, aya Kristus nē imatkesiya ado molol nem eig au, ā arokeneik. ² Aya asiyouf sain bun, aya tunī amā

* **9:9:** Sam 112:9

teneub enei nē lo fiya bun mabodōdig dedig anidi bun, aya total od arōf nigin kisi afef gen, to age afouf nigin, aya ā agoneik. ³ Momoi, amā tenebur ein mabodok, anī ere, amā kusī nigin, tenebur ein age difedig gen to age mafedig. ⁴ Amā nemā kusī nē waila are, teneub enei nē sã, anī ere, idi kau total narī fiya nigin Negur nē megeir ado. ⁵ Amā, monēya ado, ereb ereb ganan Negur nigin keleīya nē naabura gudū fiya nigin yogo iselef anī, narī mafedidig, age mafe fen, amā kisi ganan male fen, Kristus dō fiya nigin marouledidig. ⁶ Sain ā, āgenei dō fiya ganan bun, kisi feleya bagai wō gouf, amā fe temeleid ganan darau ifenēdiya nigin dodok mafef anī kisi falauf.

⁷ Ā ereb ereb teten nē anī dogol lo gedig. Taka ī yogo nigin Kristus nē ye fen, anī nigin total bagai momoi youf, amāg ī gen Kristus nē anī, ī baban kisi fouf. ⁸ Aya, ā daū yeīya ban yalesneīya nigin Odug yana ifanaman anī nigin, yanau naal yaor afe alesaufeg, aya anī nigin to mama fiyauf. ⁹ Aya neu pas bunem, ā kumī ifeneīya nigin age afef gen, ā kisi gef anī to orouf. ¹⁰ Ere nigin, tunī dirōdig, “In pas are morō ado fen, total ado, anī ere, ī amā geid mabodok sain bun, ī maleg le fen, yogon wogō are ege iledig.” ¹¹ Tamo age fediya idi keleī youf, amā ā geid to tabodok sain bun, nemā pas bun amā naig be fiya anī, amā ā geid tabodok sain bun, amā de dō maf, age mafouf bagai.

¹² Amā, tunī dogo neid yeneid dalesedig idi geid, kerē sã dede to mauf. Idi dogo, dogo nigin dogo bun fele dife fen, dogo nigin dogo bun es difef anidi, idi kisi biya sã. ¹³ Anī ere, amā yanamā to daū wal ma fen, malesauf, anī ere, amā kabī Negur igirkanaman bun dogol yanamā malesauf, kabī are ā buneg ilef. ¹⁴ Amā yanamā gerō bagai to males maroulef, amā ā gein to masim are, amā yanamā gerō bagai males maroulem, ere nigin, amā Kristus nē biya od ado, ā geineg masin. ¹⁵ Amā tunim kabī dalen anī bun

to daũ wal mafe fen, yanamã malesedig. Nemã waumã iseya are eig fiya, āgenei momoiya odugef ise le di, ā atun amã nemã kabĩ akor fatuk bagai bilalaũ fef ilauf, ¹⁶ anĩ bunem, amã āgenei akor wal mafesil fen, biya od wogõ mauf. Ere nigin, amã tamo taka nē akor bun kabĩ dalen anĩ nigin, yanamã yaleseya to oromak. ¹⁷ Anĩ ere, “Taka ĩ yana yalesef, ĩ Odug bun yana yalesauf.”* ¹⁸ Ere nigin, taka ĩ yogo yana yalesef nigin, Negur to de yedig, anĩ ere, taka ĩ Odugem yana yalesef anĩ, Negur de yedig.

11

Pol Idegēya Aposel Geid

¹ Ā aya utornag len, neneya od naal wogõ auf nigin aya wau irok, anĩ ere, ā mogo yeir ago gef. ² Aya ā bun Negur nē kiyeĩ bunem kiyeĩ afeneik. Aya ā aiweĩ tekelei, Kristus bun agirnein, are aya ā kayau taulei bagai gen, ĩ gein arouliyeĩf nigin age afen. ³ Anĩ ere, Eva gogourem ed fe idegnen gen, āgenei kisi sane le di, ā āgenei wauĩ bun, Kristus bun āgenei momoiya ado kisi karētut utorõg fen, sane lauf nigin, aya kumĩ auf. ⁴ Takam ā gein isi fen, Jesus taka nigin, amã wogõ mayein anĩ nigin gen sã, wogõ youf be, ā uur fire, uur ā walegen gen sã anĩ walogouf be, ā biya od fire, biya od ā walegen gen sã anĩ walogouf are, ā anĩ karika bagai karĩ wedigedig. ⁵ Anĩ ere, aya kisi afef, aya aposel yeneid odug anidi farumen to bagai abodok. ⁶ Aya wogõya nigin biya sã be, anĩ ere, aya keleĩ ado. Amã, enei, ā bun naab ganan bun, ereb ereb ganan bun yaor mafen.

⁷ Aya yug nigin aukesil fen, Negur nē biya od mala sã ege bagai wogõ ayein bunem, ā alesnein anĩ mosor de? ⁸ Aya ā aruneĩ yaleya nigin, sios tunĩ bun tamal isennaya alen anĩ, sios tunĩ idi bun tamal bē alen gen. ⁹ Takag, sain

* 10:17: Jeremaia 9:24

aya ã geid tabod ken, ereb taka nigin lau afen, aya ã taka to morõ afenein, ere nigin, turau tar Masedonia bun tamal disin idi, ereb aya lau afen kisi feleya bagai difanan. Ereb ereb ganan bun, aya yug ã morõ ifeneiya ator ken, toku age afouf. ¹⁰ Kristus nē momoi anī, aya nameun ibodok nigin, taka nem Akaia provins bun neu yanau yaleseya enei to katī falauf. ¹¹ Ere nigin? Aya ã nigin wau laa fiya sã nigin de? Negur ī kelei, aya ã nigin wau laa fedig! ¹² Aya ereb ereb nigin idi yeneid dalesedig anī bun, amã idi geid tekelei ya anī karī douf nigin orodidig anidi neid naabureid gudū fiya nigin, ereb aya age afef anī, toku age afouf. ¹³ Ere nigin, tamo age fediya are idegēya aposel fen, idegēya kabī tamo, idi Kristus nē aposel neweid dale fen, kabī daledig. ¹⁴ Are terēya sã, ere nigin, Satan ī yogo bagai fula fiya nē engel nawa yaledig. ¹⁵ Anī nigin, Satan nē kabī tamo idi, madur bagai nē kabī tamo neweid dalouf are, to terē tauf. Idi neid didikalauf bun, idi age difedig kilei dalouf.

Pol Yogon Kabī Nigin Morõ Musei Yalen

¹⁶ Aya baban arok, taka nem aya nigin neneya tamo to youf. Anī ere, ã ago gouf are, aya neneya tamo gen waleyag, anī bunem, ayag yanau naal alesauf. ¹⁷ Aya yug yanau yaleseya enei bun, aya Odug gen to wogõ auf, anī ere, neneya tamo gen wogõ auf. ¹⁸ Musei idi, teneub enei nē tamo kayau age difedig gen, yeneid dalesedig nigin, ayag yanau alesauf. ¹⁹ ã kisi biya bagai ado nigin, ã wauī al fiya ado neneya tamo karī wedigedig! ²⁰ Ere nigin, taka nem ã ferfer ineneik, ereb ereb ganan bun ã kadir ineneik, idegēya bun yaleyeik, yogo yana yaor falaisi ilun iselef be, welei fã fef bun, ã karī wiyēgedig. ²¹ Aya momoi eig au arok nigin mama fiyaf, are amã felu reya bagai nigin to age mafedig!

Anĩ ere, taka ã total ino fen, ereb taka nigin yana yalesauf are-aya neneya tamo gen wogõ auf-ayag total ano fen, yanau alesauf. ²² Idi Hibu tamo de? Ayag anĩ. Idi Israel tamo de? Ayag anĩ. Idi Abraham nē ibor nē tubu tar de? Ayag anĩ. ²³ Idi Kristus nē kabĩ tamo de? (Aya wadã gen eig au wogõ auf.) Aya idi wal fediya. Aya idi wal fediya kabĩ aledig, aya kalabus bun idi wal fediya abodõdig, aya idi wal fediya wagĩ difiyadig, age de fen, aya laa bun baba baban dinenan. ²⁴ Juda idi aya sain faif bun teti nain wagĩ difiyan. ²⁵ Sain towo bun, aya tibogem wagĩ difiyan, sain tekelei bun, aya meeinem dinan, waag aya abodon sain towo sanen, aya, bõ taka ado gaa taka ado, maaĩ atun abodon. ²⁶ Aya toku ayok bun, kuwei sane waila wal afen, bē tamo nē waila wal afen, neu fõ turau tar geid kiwai wal afen, haiden geid kiwai wal afen, taun bun kiwai waila wal afen, gerere tuan kiwai waila wal afen, maaĩ bun waila wal afen, idegēya turau tar nē kiwai waila wal afen. ²⁷ Aya kabĩ total ale, morõ ado fen, sain musei mulaĩ to ainēdig. Aya naũ ado naan ail fiya fen, sain musei saaf sã aledig. Aya menig fiya fen, gemũ abodõdig. ²⁸ Ereb ereb ganan anĩ sirin, aya naa ganan bun, sios ganan nigin suwēya morõ anim lai fiyadig. ²⁹ Aib felu re di, aya to felu rauf de? Aib mosor bun iroule di, aya to wau morõ fiyauf de?

³⁰ Aya yanau yaleseya nigin bagai youf are, aya ereb ereb neu felu reya anĩ yaor fedig anĩ nigin yanau alesauf. ³¹ Odug Jesus nē Dei, Negur, ã anĩ yana faimud yaleseya, ã keleĩ, aya to adegek. ³² Damaskus oun, gawaman nē mudur, King Areta farumen ã, aya yaleya nigin taun bobog bun lo fiya tamo inenēdin. ³³ Anĩ ere, aya karam kuren dinena fen, kau mosokoronem folo folõ difiya di, yogon iman tamal ulõ aran.

12

Pol Nē Mala Seleulã Kurã Fiya Ado Yogon Kudag Kereuk Fiya

¹ Aya yanau alesef alauf. Ereb mala to aloufeg, aya Odug bunem malau seleulã kurã fen ado, kurõ fesiya od alen anĩ wogõ auf alauf. ² Aya tamo taka* Kristus bun ibodok anĩ keleĩ, ĩ kulu yar fotin ilelen bun, Negurem yale, saa tano towo bun irou iselen. ĩ bouwa ado be, bouwa sã be, aya keleĩ sã, Negur keleĩ. ³ Aya keleĩ, tamo enei-ĩ bouwa ado be, bouwa sã be, aya keleĩ sã, anĩ ere, Negur ĩ keleĩ- ⁴ ĩ paradis bun irou iselen. ĩ ereb ereb tamom faded feleya kisi feleya sã, tamom wogõya nigin katũ fiyen anĩ karĩ yen. ⁵ Aya tamo age fiya anĩ yana alesauf, anĩ ere, aya yug nigin yanau to alesauf, aya neu felu reya nigin dogol yanau alesauf. ⁶ Aya yana yaleseya nigin agirĩfeg, aya neneya to abodõf, ere nigin, aya momoi anĩ wogõ auf. Anĩ ere, aya yana yaleseya nigin atorok, are taka nem ereb aya age afef be, wogõ auf anĩ wal fe fen, aya nigin fatuk to kisi foug nigin age afef.

⁷ Kurõ fesiya odug bagai enei alen anĩ bunem, aya yug yanau yaleseya katĩ feleya nigin, bouwa bun kudag ifanan, Satan nē arũ tamo darau ifanauf nigin bouwa bun yun, are aya yug yanau yaleseya katĩ feleya nigin. ⁸ Sain towo, Odug aya bun anĩ yalalkanauuf nigin, aya ĩ agonen. ⁹ Anĩ ere, ĩ irokanan, “Neu wau ifenēya õ nigin kilei bagai, ere nigin, neu megeir felu reya bun kisi feleya bagai wõ yef.” Anĩ nigin, aya fatuk bagai wau al fiya bun neu felu reya nigin yanau alesauf, are Kristus nē megeir aya bun ibodõf nigin age afouf. ¹⁰ Anĩ nigin, Kristus nigin, aya felu reya bun, kono fiya bun, wau morõ bun, darau bun, morõ bun,

* 12:2: Tamo taka anĩ, Pol yogo nigin irok.

wau kulĩ yedig. Ere nigin, sain aya felu rauf bun, aya total adodig.

Pol Korin Tamo Kayau Nigin Suwẽ Yen

¹¹ Aya yug nigin neneya tamo wõ aun, anĩ ere, ã aya nugo wiyage di, aya age afen. ã aya nigin yanau walesegem, are dem, ere nigin, aya ege, anĩ ere, aya aposel yeneid odug farumen to bagai abodok. ¹² Aya ã atun abod ken, ereb aposel bagai nẽ anĩ, uris, ereb urug bagai ado, memelik, morõ ganan bun, feseya sã anodin. ¹³ Aya sios ganan bun age afedig anĩ, ã buneg age afen, anĩ ere, ereb tekelei dogol ã bun to age afen, are aya ã isennaya nigin morõ taka to afenein anĩ dogol. Neu kũ fenẽya enei nigin wedereĩ tu kel!

¹⁴ Gama aya eneim sain towo ki ayeĩf nigin saika afef, aya ã isennaya nigin morõ to afeneif, ere nigin, ereb aya orouf are, ãgenei safina sã, ã aug anĩ. Kesum sina tama nigin moni to kuru difedig, anĩ ere, sina tamam nedi gereid tar nigin age difedig. ¹⁵ Anĩ nigin, aya wau al fiya odug bun, neu safinau ganan ã nigin araile fen, aya yugeg arailauf. Aya ã nigin wau fatuk afeneĩ di, ã aya nigin wauĩ naal bagai wanagauf de? ¹⁶ ã tunĩ aya nigin urõgedig, 'ĩ amã masennẽf nigin morõ to ifanaman, anĩ ere, ã idegẽya keleĩ bagai, idegẽya kor bunem gei famãdig,' gedig. ¹⁷ Aya tamo susur afedin anidi taka bunem, ã adegnei ken, ãgenei safina alen de? ¹⁸ Aya Taitus ã gein ileyã nigin total bagai aroken ken, aya amã turamã ã ado sur afedin. Taitus ã to idegnei ken, safineĩ yalen, ã age fen de? Amã kisi tekelei bun age mafe fen, naab tekelei dõ mafen, anĩ sã de?

¹⁹ ã sain enei ganan, amã mug isennamãf nigin ã bun age mafedig be, kisi gedig. Amã, Negur mala bun, tamo Kristus nigin momoi def anidi gen, wogõ maudig. ã

nemã oboimã, ereb ereb ganan amã age mafef, are ã megeir walogouf nigin. ²⁰ Sain aya asiyouf, aya ã nigin kisi afef gen to ailiyeiã nigin be, ã aya nigin kisi gef gen to uleyageya nigin, aya kumĩ auf. Æ bun an, kusĩ, kiyeĩ, seyeya, fara fiya, ne tã bou yũya, dumen od irõya, aya aya yeya be, ekul ge ufaregeya nigin, aya kumĩ auf. ²¹ Sain aya baban asiyouf, neu Negur ã meleĩ bun aya mama ifana di, musei kulu mosor dino fen, amuyẽ, noli tobonunã fire fire ado, bouwa nẽ oroya nigin total sane wau fãya bunem waud to falei difen anidi nigin, aya wau gudũ fouf nigin kumĩ auf.

13

Idikeleya Nẽ Weder Irouya Od

¹ Eneim sain towo ã gein asif. “Od ganan isennẽya urom be, towom sigoredim kurõ difesiyouf anĩ megeir gouf.”*

² Uruwa aya asi fen, baban asi ã geid tabodon sain bun, aya wedereĩ irouya od arokeneĩ bure afelen. Gama aya ã geid to tabod ken, anĩ ket, idi uruwa mosor dinodin anidi geid tunĩ ganan arokeneik: Aya kelau asiyouf sain bun, idi to loloum afediyouf, anĩ ere, kafĩ fiya afenẽdiyouf, ³ ere nigin, ã Kristus ĩ aya bunem wogõ yef anĩ ileya oroyeik. ĩ ã bun kabĩ yaleya nigin to felu ref, anĩ ere, ĩ ã atun megeir ado. ⁴ Ere nigin, momoi bagai, ĩ felu reya bun aa tetek bun dun, anĩ ere, ĩ Negur nẽ megeir bunem mata ibodok. Age fiya gen, amãg ĩ bun felu reya, anĩ ere, Negur nẽ megeir bunem, amã ĩ geid mata mabodõf. Age mafe fen, amã Negur nẽ megeir ã atun yaor mafouf.

⁵ Æ momoiya bun ubodõgef be sã be anĩ, ulogouf nigin ã aug es gouf. Æ aug kisig uleg. Kristus Jesus ĩ, ã bun ibodok anĩ ã to keleĩ de? Sãf are, momoi bagai, ã es fiya

* 13:1: Diuteronomi 19:15

bun kubũ gef. ⁶ Anĩ ere, amã es fiya bun to kubũ maun anĩ ã ulogouf nigin, aya momoi auf. ⁷ ã ereb sane taka to ago gouf nigin, amã Negur bun kosẽ mauf. Are amã es fiya bun to kubũ maun anĩ tamo kayau dilouf nigin sã, anĩ ere, amã es fiya bun kubũ maun gen dilemãfeg, ã ereb madur ago gouf nigin. ⁸ Ere nigin, amã ereb taka momoi anĩ to kiwai mafenek, anĩ ere, momoi nẽ nigin dogol age mafef. ⁹ Amã felu mauf bun, ã megeir adof nigin, amã waumã al fef. ã kisi feleya bagai wõ gouf nigineg, amã kosẽ mauf. ¹⁰ Gariya eig fiya nigin, aya ã geid to tabod ken, enei atotof, are sain aya asiyouf, aya neu yanau bunem totol od ã to arokeneif nigin age afef, yanau are ã daũ yeiã ban yalesneãya nigin Odug ifanan.

Idikeleya Nẽ Aanya

¹¹ Idikeleya bagai, turau tar, dabuo. Kisi feleya bagai wõ gouf nigin ago gouf, aya neu wogõ anĩ karĩg, kisi tekelei waleg, wauĩ inosiya bun ubodõg. Ago ge di, wau laa fiya ado wau inosiya nẽ Negur ã geid ibodõf.

¹² Fateul umãya bunem, abob aan wiyẽg. ¹³ Negur nẽ tamo kayau ganan, nedi aanya ã bun sur difef.

¹⁴ Odug Jesus Kristus nẽ wau ifenẽya, Negur nẽ wau laa fiya ado, Awa Uur Fateul nẽ nival yũya ã ganan bun ibodõf.

Mata Ifenēya Nē Od
The New Testament in the Marik Language of Papua New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 19 Oct 2021 from source files dated 20 May 2021

d7099f9d-3bdf-5620-8eb3-7e6c51cab7ea